



Projet promovût di 'Il Friuli' e 'ARLeF'

**TANT PAR RIDI**



Une fuee di basili, cjaminant pe strade e sburte un mac di savôrs e i dîs: "Spostiti, che tu sês simpri tal mieç!"  
 E il mac di savôrs: "Sta atent tu, che se no ti pestil!"

**CJANTIS, FILASTROCJIS, POESIIS**

**I DÏS DE SETEMANE**

Lunis al bale dongje une scjale  
 Martars al sune sore la lune  
 Miercus si svee sot di une fuee  
 Joibe e rît dentri di un nît  
 Vinars al zuie e nol pense a nuie

Sabide e polse finide la corse  
 Po alcin ducj la creste  
 Domenie e je fieste

Rit. A son chestis lis zornadis che a formin setemanis  
 La cjançon o volin cjantâ che po e torne a scomençâ

(Peraulis di Daria Miani; musiche di Flaviano Miani)



**LIS AVENTURIS DI VIGJI**

**VIGJI E IL BASILI**

Suntun barcon dal plan teren de cjasute colôr narançon, Roberto al ten cun braure une bieles plante di basili: le cure cun tant amôr in spiete de bieles stagjon, par preparâsi cussì terinonis di pomodoros cun fueis di basili. A lui, a Mauro e a Daria ur plasin di murî, massime se cuinçâts cun cevole, mazorane salvadie, sâl, vuela e asêt. Une di di Jugn, e passave pe strade une sioie tarondute, cui cjavei ducj dispetenâts: al someave che e ves za preparât il so plan di azion, stant che e veve in man une sporte pe spese vueide. Pontant drete al barcon, si jere svicinade cjalantsi ator mil voltis. Intant che e jere pronte par distacâ, cence creance, un biel pocj di fueis, sul barcon Vigji al veve petât un balç, juste in timp par fermâle, tirantji une sgrifignade su la man, che dal sigûr no si dismentearà mai! Cjapade pôre, la sioie e jere scjampade vie di buride. Cuissà ce che lu veve sburtât cun cussì tante energjie a difindi il basili, se nancje lu veve mai cerçât? Dut câs, si è meretât une bieles medaie tant che brâf... vuardian di cjase!

(Al va indenant...)

**ZÛCS** Cercle tra chestis imagjins chê li che a son lis fueis de plante di basili



LA DETULE DAL DÏ  
**POMODORO E BASILI: MATRIMONI PERFET!**

**Sêso bogns di fevelâ par furlan?**  
 Inviait un vuestri video indulâ che nus mandais un pinsir, une cjançon, une barzalet, une conte par furlan o un vuestri dissen li che si viodi un moment in particolâr di une pontade di Maman! e us mandarî in onde.  
 Mandait al numar 333/7202814 o ae direzion di pueste eletroniche maman@tvstar.com  
 Ocjo, il telefonut al va tignût in orizontâl e no in verticâl!

Pagjinis curadis di Daria Miani  
 Consulence linguistiche de ARLeF

**LU SAVEVISO CHE...?**

■ L'odôr fuart dal basili al jude a tignî lontans i insets. Al è ancje un repelent cuintri i mussats.



**ARLeF** AGJENZIE REGIONAL PE LENGHE FURLANE



**RICETIS - Master Cogo Furlan**

**GJELÂT DI LIMON E BASILI**  
 Par preparâ il gjelât di limon e basili o vês dibisugne di:

- 25 grams di fueis di basili
- 150 grams di zucar
- 500 millilitris di pane
- 250 millilitris di lat intîr
- 1 prese di sâl
- 5 ros dai ûfs
- La scusse gratade di un limon



Mi racomandi, prime di scomençâ: lavaiti simpri lis mans; metêt sù lis manecis, un grumâl intor par no sporcjâsi, un

cjapiel di cogo par no pierdi cjavei inte pignate, e fasêtsi simpri judâ di un grant par ducj i passaçs.

Sêso pronts? Alore scomencin!  
 Lavait e suait lis fueis di basili, masanaitis tal mixer cul zucar e metât dose di pane. Masanait fin cuant che o rivais a vê une creme slisse.

Dividêt in doi la creme. Zontait a metât de creme la pane vanzade, messedait e metêt in bande.

Metêt chê altre metât di creme intune citute cul lat e une prese di sâl. Scjaldait sul gas e

distudait prime che e tachi a boli. Messedait cun energjie i ros dai ûfs fin cuant che a fasin une bieles sbrume. Zontait la creme cjalde ai ros dai ûfs e continuait a messedâ.

Metêt sul fûc une altre volte par fâ infissî. Messedait simpri!

Gjavait dal fûc e, filtrant cuntun passin, zontait la preparazion ae creme tignude di bande. Messedait une vore ben.

Zontait la scusse gratade dal limon e lassait disfredâ tal frigorifar par almancul 2 oris.

Par finî, metêt il gjelât te gjelatiere e servîtu cuntune fueute di basili par decorâ.

Imagjin gjavade dal sît: <http://www.gustoblog.it>

**IDEIS PE LETURE**



L. Peressini (cu la colaborazion dai arlêfs de scuele de infanzie "M. Andretta" di Lignan), "Il drâc di Udin - une liende furlane", Radio Spazio 103, 2017.


**Il labirint**

Jude lis dôs stelis marinis a tornâ a cjatâsi, segnant la strade juste che a ân di fâ.



**Colp di voli**

Sâstu di tropis che a son lis scarpis inte figure?



Fruts, al è tornât Maman! cuntune gnove stagjon e cun tantis sorpresis!  
 Us din apontament **su telefriuli**

**ARLeF** telefriuli

**Gnove stagjon**  
 Ogni vinars aes 17.40  
 miercus aes 17.40  
 e domenie aes 7.00